

四庫全書

集部

欽定四庫全書

集部

吳郡文粹續集卷五十

詳校官庶吉士臣朱理

侍讀臣孫球覆勘

總校官進士臣繆琪

校對官監丞臣張曾炳

謄錄監生臣劉為翰

欽定四庫全書

吳都文粹續集卷五十

明 錢穀 撰

詩

立春之二日大雪平地三尺吳中五十年無此

雪

韓奕

蕭條江縣空歲暮寒風積雨雪連日夜平地深三尺遠
近寂無喧四顧同十色沾足良可佳有祥詎難識空街
人迹斷寒光入虛室重衾不知煖厚纈衣猶慄餘生近

老病起卧但微息緬彼遠道人驅馳正行役在物實同類有懷屬此夕

寄俞立菴

相望才一里不到已多時家似山中住人非世上知草深疑斷路水漲訝平池枕簟竹林下乘涼想最宜

包山毛公壇

微茫太湖心諸山此為最宛如海上國平寬納幽邃田廬錯上下人烟萬家聚榘梨及橘柚栽植窮地利想當

秦漢間尚未通風氣龍蛇不敢窟人跡未始至毛骨竒
公仙有福當此地開荒治丹術道成遂仙去嗟余後千
年恨不身親遇願執洒掃役服勤於鼎器微生倘有分
冀沾餘粒棄嵯峨三尺壇草藥春來異縹緲千仞峯烟
霞景仍秘平生出塵想矯首徒仰企浮雲影悠悠無從
候仙馭山水漫娛人凌風振歸袂

橫山西隱菴

孤艇溪邊入千峯雨裏登老年雖厭客長夏欲依僧院

古青苔滿林寒宿霧凝解衣禪榻上未覺有炎蒸

黃埭興國寺

粳稻田初熟烟霞日欲西孤舟僧共載古寺鶴同栖
樹抱溪流合窻陰月影低紀游閒有咏常向壁間題

八月十四夜過望亭

夜裏行船過望亭滿塘秋月露初零閒吟忽記唐人咏
喜見平田晚稻青

送友人還崑山

張適

雨歇東風曙色微
婁江艇子逆潮歸
花明祖席清尊酒
柳拂儒冠白苧衣
上水海魚堪斫鱠
近人沙鳥不知機
烟塵滿眼且歸去
莫負春山采蕨薇

春日登胥門城樓

城頭華構勢翬飛
西望吳山落翠微
春草荒臺麋鹿過
夕陽古塞雁鴻歸
關河萬里歸興廢
城郭千年感是非
惟有樓前太湖月
夜深依舊弄清輝

雨後過海雲菴
招提寄徐耕漁王耕雲

雨後穹窿萬掇青白雲粘樹溼冥冥寺從栖鶴松邊露
泉向啼猿峽口聽徐孺閒居過徑遠王猷茅屋隔林局
相邀共借棲禪榻夜粥燈前煮茯苓

送崑山知州任嘉定

夕陽江上雨初殘楊柳搖金拂馬鞍白鳥笑予長送別
青山留客共盤桓桃花水泛征帆穩燕子風生祖席寒
在路獨吟今夜月到州仍作舊時官民懼歎歲傷凋瘵
君有長才定治安行見經綸應重托却留遺愛遍江干

送長洲主簿兼司稅

佐令勞才子秋深始到官
蒹葭催暮雨蟋蟀泣初寒
侯吏迎車近商民望稅寬
政聲藩府重寵擢諒非難

寄陳山人寅

草堂孤在夕陽村每憶城南綠水園
春露尚沾萱草背夜寒忽散鵲鴿原
孤鴻歸興寄琴調香蟻忘憂到酒尊
寂寞揚雄甘老去百年名姓至今存

宿山中徐畊漁宅

舊業非忘世，新朝似隱淪。
雲生籬徑晚，花覆石房春。
子大憂無似，書多未是貧。
酣歌頻續燭，竟忘主和賓。

題笠澤陸氏隱居

隱居何處所，笠澤水西偏。
贍俗田千畝，容身屋數椽。
柱陰侵座薄，柳色映窻妍。
軒幕花前霧，亭分竹裏泉。
澗深忽見日，林茂欲無天。
石壁琴常潤，書牀硯已穿。
俯池厓欲墮，登樹薜相牽。
瓶貯滋花水，簾通煮茗烟。
蓄書千卷足，課子一經傳。
字罷臨流憇，公餘選石眠。
病多諳藥性。

閒久積書扁奕客爭饒子琴僧上斷絃尋山穿雨屐看
竹棹孤船湮沒遵時悔栖遲任性便感恩懷耿耿厭俗
思翩翩要我頻相過佳章夜共聯

與陸天游張南村諸公遊溪西華嚴菴

讀書只在松檜林不道春色孤村深鳩啼雲暝亂游思
花落水流驚客心過溪尋僧蘭若僻掃石坐我莎蘿陰
杖藜田路逐樵返落日已下西湖岑

寄道衍上人

京國徵行喜早歸茅菴屏迹揜柴扉文章留世新編稿
締綌縈身舊賜衣晨鼓憶分天界粥春風還采海雲薇
相期共向林泉老已悟年來五十非

與王正仲夜話

寒過已多時春來不爽期花前初熟酒別後只添詩續
燭知宵永聞雞悟睡遲劇談渾莫倦明發又天涯

送坦雲軒住中峯寺

中峯香刹翠雲邊支遁昔日曾栖禪白馬千年不復返

青山萬頃只依然師行冰雪歲云暮舟渡吳淞江可憐
名地猶來在人勝好勤修業繼前賢

蘇人葛秀才送余至京師及之官又送至大勝
驛值大風雪感其高誼臨別賦此

君不見昌黎公藍闕馬蹄風雪中又不見玉局翁黃州
路遙如阮窮我生今年五十七讀書吳山畏人識昔年
曾作水曹郎聖恩早賜歸蓬華邇來又越十六年老病
囊無挑藥錢去年府州忽相荐豈謂聰明不及前茅茨

驚憂病增劇展轉歲除千感集今年始及趣裝行兒女
牽衣憐我泣抱病艱苦至京師上赴天官陳履歷聖恩
浩大不加罪命向廣西佐方伯青衫白髮老從事自媿
才疎難稱職臘月出皇都白門啼亂烏乾坤忽變色風
雪方載途蹇驢凍屢仆瘦僕飢且痛俄至大勝驛面皮
盡黎色丁寧僕莫嗔勞役纔第一下車就酒家酒薄葷
不佳餒乏敢嫌此情惡良可嗟酒家頗見喜煖湯濕我
指挹酒為續杯垂情數相語乃知平生交勿薄屠沽子

邂逅遇一官問之稱孝廉共買金陵酒同上廣西船廣
西在何許浩渺烟江水舟師數驛程四千三百里大寒
朔大江江流急淙淙沙頭暫停棹飛浪壓蓬窻况乃途
路迂老年俄此罹羈情正愁絕忍送葛翁歸葛翁恩恩
向我別胸中有言不及說我今竭力報皇恩翁亦還家
保名節我家呱呱好孫子翁先還家憑寄語到官急遣
汝爺歸男長讀書女鍼黹

舟中聞吳歌

清湘夜駐木蘭橈
月落霜天雁唳遙
忽聽吳歌驚夢斷
此身只訝泊楓橋

過楓橋留別城西諸友

煩君遠餞意偏饒
念我離羣乍寂寥
祖帳雨催詩欲就
郵亭風勁酒頻消
移舟射瀆黃昏近
路轉江村碧樹遙
記取今宵分手處
烏啼時節過楓橋

早春過望亭驛喜晴追次唐嘉祐韻

遠墅晴煙散綠蘋
推蓬起坐整衣巾
野花開處多臨驛

水鳥飛來似送人，愁裏聽窮三日雨。客邊吟到一分春，
今朝已有尋芳客。來往東風陌上塵。

宿閭門

霜滿烏啼夜，月寒客窻燈。火著愁看故園相，去無多路。
便覺今宵睡不安。

客金陵送盛寅還吳

官柳籠陰半已青，俄聞歸棹發金陵。秦淮雪裏春潮長，
楚甸雲開晚日昇。先我還家緣客久，如君多藝更誰能。

莫辭同醉長干酒明日相思恨不勝

送俞立菴應湘府聘

鶴書遠聘到岩阿拜手幡然出薜蘿
天接孤帆秋水濶門閒五柳夕陽多
吳雲漸杳鄉邊樹湘水微生渚外波
此去賢王應待久安車行旆莫蹉跎

宿開元精舍

落日樹陰陰禪幽靜客心香烟秋殿寂
燈火夜厨深茗熟僧先睡詩成佛對吟
自憐耽僻志只合卧雲林

賦得秦淮夜泊送吳秀才歸吳

烟霧淡籠月泊舟依淺沙且沽今夕酒聽唱後庭花淮
水迎歸路吳山看到家鄉中莫留滯慈母在京華

賦得太湖春水送華以及歲貢

浩浩來天日溶溶接漢津光隨征櫂遠綠染客袍新瑞
雪初銷臘恩波總是春明朝禹門外一躍有誰倫

賦得劍池送友之京

岩樹鱗皴生鐵花一泓寒玉清無瑕山中有穴通海脈

人間無地埋青蛇，居僧經歲不飲井。游客常時來煮茶，
安得干將復飛出，贈君佩服歸京華。

楓橋歌送姜秀才歸金陵

君不見楓橋水，奔流直下太湖來。環繞闔閭城西地，其
間風土何佳哉。層樓疊榭侵雲起，望處人家半臨水。水
邊歌舞不勝春，橋下帆檣停似蟻。復有大道接金陵，送
客每來橋上行。山寺鐘鳴知夜半，漁村月落見燈明。今
朝却餞吳公子，解我金貂沽綠醕。帆挂長洲苑外烟，衣

沾虎阜山頭雨暮烟秋雨益淒其別緒離情無限期昔
時不是今時景今人還誦昔人詩見說長干花似綺君
歸更莫思鄉里

移家將之金陵宿楓橋

山寺烟初暝江村月又生辭家無十里不寐到三更犬
逐漁燈吠鐘催客棹行從茲去鄉土寧復是吳氓

送醫學盛啟東之京

欲識軒岐學相將上九天祖陳楓葉下席展杏行邊暫

別燒丹竈來登罨畫船衣冠頌賜日雨露想承偏

靈岩懷古送瑤上人

吳宮成梵刹銷歇尚遺名臺峙荒琴薦池存酒研泓綺
羅無復見泉石有餘清相送師歸去重增弔古情

送任二尹復官吳縣

考績曾聞謁紫宸俄看征棹別江津郎官拜去雖依舊
雨露承來又一新古縣花明千樹曉重城柳色萬家春
知君德化吳氓久風俗從茲想更深

送金徵士問應書誥薦

金卿二十即能文，染翰爭誇逼右軍。
用筆不愁窮兔穎，臨池惟愛弄鵝羣。
常年閉戶稀曾出，一日佳聲遠自聞。
忽睹荐章從聘召，為書皇詔錫功勛。
治裝早已辭親舊，拜手明當謁帝君。
花底傾來杯欲盡，柳邊携處袂將分。
嗟余蠖守依環堵，羨子鵬搏在五雲。
聖代英才超往古，家鷄野鷺任紛紜。

逢沈以潛

何處移來一艇間，褰衣同憩樹陰間。
自緣別久多情話，不為看山忘却還。

賦得千人石送沈寅仲

林下盤陀石，山中不記春。
竚看無一畝，容坐僅千人。
雲護平如砥，苔封厚似茵。
祖筵從廣設，懽會在逡巡。

送吳敏學還吳省親

雙親白髮老東吳，令子丹心向帝都。
正及歲寒歸故里，不辭雨雪載長途。
無人似爾情偏厚，有酒如澗興不孤。

他日相思凝望處暮雲春樹總模糊

登天平白雲亭

白雲泉上白雲亭京國歸來喜重登
欲試坐間誰老健酒酣先上最高層

送韓伯承還吳

今朝佳節是花朝相送重來白下橋
老語生憎鶯舌巧新愁翻壓柳眉嬌
天街有雨塵還少酒巷無風旆自搖
咫尺清明歸未得羨君先上木蘭橈

虎邱送別二首

天上樓臺海上山，何年移却在人間。不因此地多清勝，
那得遊人數往還。望處已添吟咏興，到時頓解別離顏。
今朝送客同春去，門外白雲千頃間。

相送瀛洲客，來登海湧峰。岩雲騰白虎，池劍躍蒼龍。境
勝詩情愜，盃深別思濃。悠悠分袂處，高塔夕陽春。

題杜瓊草堂遺意卷二首

舊業成都萬里橋，百花潭北草堂遙。門無縣吏催租稅，

座有鄰翁耐寂寥
松影滿庭間
白日茶烟繞榻颺
清飈
酷憐杜甫成詩史
翻笑揚雄作解嘲

草堂遺址在重構
剪荒榛松偃吳門
月花移蜀地春流
芳知有本繼業
豈無人喜到瓊枝
茂詩宗又一新

賦得龍門送范原紹應聘

凌雲峭壁聳崔嵬
不待神功禹鑿開
一徑直通天上路
雙厓隔斷世間埃
雖無鎖鑰常關閉
肯放豺狼恣往來
今日送君騰躍起
從龍為雨潤枯荄

遊天池訪愷上人不遇

山中夏將半嘉樹敷陰重閒携綠玉杖拄到青蓮峰
苔徑少行客微存舊游蹤臨池滌煩襟萬壑來松風蘭若
倚天開峒崑白雲封高軒蔽竒穴踈櫺銜翠濃未緣釋
子共所欣良友同明當發毫素贅言遺愷公

送翰林劉孟功姪鉉還吳

君家吳望族名冠儒林表自昔我先人素有通家好若
翁余同庚交誼如管鮑翁也早世久余亦慚衰老阿咸

能繼業丰姿美年少賦罷擬揚雄詩成驚謝朓一朝省
世父治裝遠來到欲慰十年別不憚千里道再叙骨肉
情重講家庭教談話每宵分尊卑愜懷抱昨承訪蓬華
出迎雙屐倒從容問答間寒威頓除掃高門產麒麟吾
儕亦光耀正欣接吟席又復理歸棹草色瀛洲新鶯聲
上林早相送出都門春江波浩浩

寄蘇性初

辭親遊太學歲月去駸駸夜雨青燈夢秋風故國心一

官仍未遂三載又將臨早晚重歸省相隨賴有琴

寄沈公濟

蕭齋嬰疾久不覩沈休文槐畔愁添雨天邊目斷雲丹
青誇獨步顧陸願同羣擬剪西窻燭連牀話夜分

過范氏山莊

林靜書聲隔巷聞輪蹄不到絕囂氛天寒鶴立蒼松久
童子開扉掃白雲

正月三日陪陳士初錢孟書游北禪寺訪瑾上

人不遇分韻得款字十六韻

昨見葭灰飛玉琯已覺陽和布晴煖條風吹綠草荇萌
殘雪消寒柳條短新正擬欲探春游今朝便有尋詩伴
青鞋布鞵慣林泉華髮心情厭林館北禪古刹吳城陞
眼界清幽塵跡斷羣賢偶集本無期去路雖遙亦何憚
行行不覺到梅檀一徑蒼苔平且坦有意來參乎尹師
適逢飛錫歸遲緩惟存法王梵公像趺坐繩牀右偏袒
山童見客遠相迎作禮殷勤為延款盛來香粒堆飯盂

供處白花浮茗盃嗟予夙抱烟霞癖野性不羈久踈嬾
深冬遠自白門還巾染黃塵衣未澣幸叨方外相追隨
得遂閒心適蕭散襟懷頗豁吟思增人境俱寂清風滿
詩成坐待師不還白雲散漫無拘管

過思菴郊居

周忱

故人家住碧溪濱出郭書聲白晝聞過訪幾回因看竹
歸休何日共論文山容半向窻間出泉脈遙從樹底分
最是快人心目處連疇杭稻翠如雲

送舉子劉昌赴會試

早從侯類究羣經虎榜新題屬妙齡
出馬羣空北土鵬因鷓化運南溟
功名有待標青史禮樂行看對大廷
席上儒珍期自保一尊相送重丁寧

送沈郎中任蘇州太守

擢自儀曹領郡符朱轡熊軾向姑蘇
身馳驛傳聲華重手捧天書寵渥殊
政洽九江重渡虎時清合浦盡還珠
故人尊酒遙相送努力期君展壯圖

贈草窗先生詩

并序

劉鉉

詩始以道其所自中則偉其才而惜其不偶故歸之於命以壯其志末則托于德之之心而必其遠大雖此皆公之寔而語淺意膚拙于形容進教是幸

磊落八尺軀魁梧且雄壯靜聽驚論言一見竒貌狀早從綵侍下兩京飽遊訪出門狎師友龐鄉偕頌相所以韋布間弱冠得聲望而翁醫垣耆和緩相頡頏竭去捐館舍東吳遠歸葬朝廷加賻卹師保為銘壙弔送來親

朋駢聞車百兩纍然在哀經廬墓足愴愴盛暑或忘妻
隆冬或不續時序倏遷移歲月不多讓里閭稱孝廉俊
英願隣傍撫臨冬官周隸屬郡侯况僉謀起遺野䟽荐
交為張百鳥不如鴉一言亦須尚先皇重璫璣雕琢伺
宗匠方期就壘卣豈復數益益鼎湖龍忽升孤臣竟何
仰周南雖滯淹坎珂寧悲悵吹噓豈無媒茲情疇克諒
得非命數竒那關過讒謗奔趨怪卑汙潔身慮高亢消
息理固然欲得必由喪窗以草為名志與先賢伉滿庭

春不除生生意深廣陟岵空為盱天際孤雲颺王事既
靡監滄澗誰為養心事一于詩激發何慨慷靜中聊自
怡抑莞賴舒暢短章既春容長篇亦跌宕府藏出珍奇
鈞天奏空曠光華掩魚目鏗鉤咽蟲響正如巨陂中魚
龍交蕩漾蒼波合東流滔滔浩難障有時我為歌三嘆
而一唱岐黃術精深有似淮陰將克捷若有神鑿攻無
不當務施濟利仁札瘥咸倚仗而余病妻孥藥物屢承
貺平以補清羸疏以駢瘡瘴厚德懷寸心感激忍遺忘

擬報持幣金恐君憎冗長擬贈述俚辭恐君厭浮誑惟
年改元初青陽日方向國家喜清明輔弼元凱行皇猷
足黼黻天工共寅亮氣和時已康物阜民無恙西山雪
霽佳潞水漸流漲肩輿既堪命輕舸宜同榜行厨載山
肴玉瓶注家釀俯仰天地寬遨遊跡漫浪靈風颯然生
送子雲霄上

重寄杜用嘉

有序

余往歲雪中因憶使第梅花已奉鄙作欲為來春之

佳約張本今既及期復爾踈濶感時對景不能無言
蓋所以歎流光之易邁嘉會之不偶也

去年花開雪飛處殷勤曾賦懷君句欲期來歲故山春
携酒林間共歡聚豈知于今花發時又復兩地空相思
相思正濃花正好千里東西夢魂繞夢魂何處苦思花
花總飄零人未老

懷陳孟賢

綠水園中萬竹深當年曾此寄幽尋
芹花池上看垂釣

杏樹壇前聽鼓琴投轄豈能忘舊會分題長憶課新吟
別來音問如金玉令我長懸一寸心

挽陳怡菴先生

門外青山架上書東吳佳處是幽居一庭風雨閒芳草
十畝園林隱敝廬伯玉有文垂宇宙太丘無意老鄉閭
執經猶記相從日寒雪初深聽講餘

弘文入直被恩私曾受先朝聖主知萬里康莊騏驥遠
九重霄漢鳳皇儀金蓮夜草平明詔綵筆朝題應制詩

奪得錦袍多意氣，賜陪龍駕宴瑤池。

故里懸車歲月深，春風華髮漸盈簪。
鄭均退後寧無祿，疏廣歸來賸有金。
湖水烟霞同剡曲，竹林觴咏似山陰。
興闌賓散青天月，池上誰歌醉白吟。

奎星光揜夕雲浮，鄰杵無聲巷不謳。
身世百年雖似夢，文章千古更何求。
詩哀吏部憐張籍，謚美河汾念薛收。
雙淚潺湲何處落，盡隨江水向東流。

送真上人住姑蘇寶覺寺

聞說湯休最少年，早將心印一燈傳。
滇南鄉土渾無夢，吳地江山自有緣。
暮雨踈鐘烟樹外，夕陽孤塔水雲邊。
遙知聽法龍來處，香散花飛晝滿天。

近得家兄書，書語欲促鉉歸。展誦之際，不覺悵然。

弟兄何處憶相違，涼月閒齋半掩幃。
燈下屢看新寄字，客邊穿盡舊縫衣。
參辰欲曙隨雲沒，烏鵲驚寒繞樹飛。
代馬北風猶自戀，故園誰道不思歸。

懷瀚兒

憶從生汝在京畿膝下晨昏肯暫違
溫被每同寒夜宿
篝燈曾候晚朝歸
留賓歡處傳杯酒
為我酣時解帶圍
遙想歲闌風雪裏
懷親能不思依依

贈送吳江僧會

杖錫遨遊上九天
袈裟曾拜玉階前
人間無繫空身相
方外浮名逐世緣
殘雨踈鐘江寺遠
夕陽古塔水雲連
贈言好為論吾道
聞說聰明似大顛

懷杜用嘉

十年膠漆重交情憶昔同門聽講經詞足清新皆白雪
筆多神妙在丹青彈碁留掃松邊石看竹期過水上亭
今夜相思何處切半窻殘月上疎櫺

輓劉僉事

青驄朱節遠觀風銀漢靈槎萬里通頻見素裝貽陸賈
又勞束帛起申公九天雨露恩常在百歲衣冠蛻已空
聞說西湖湖上路甘棠新長舊時叢

寄姪淳澤

還家見汝倍多情我昔離家汝未生
今夜客窗千里夢竹林誰繼舊時盟

望楓橋

鄉山遙望翠高低許野橋邊日欲西
江郭到城無十里不妨月出夜烏啼

吳宮怨

張楷

江空月冷天如水銅龍漏咽沈檀死
宮中粉黛一十人

醉眼相看嬌妬起，自入朱幃并翠戶。幾番曾得君王數，
君王好惡自不常。豈在區區歌與舞，宮門倚天鈴索垂。
凍霜吹老青銅枝，玉鸞隱隱背墻去。何人邀得君王歸，
君前豈無容妾地。舊劍猶存肯終棄。

移居橫山

謝應芳

為愛橫山山水清，山前築室小溪滎。老夫枕石看雲卧，
兒輩求田候雨畊。古井寒泉龍有宅，孤村夜月犬無聲。
廿年老眼風塵暗，猶喜如今見太平。

送道士謝清一歸吳中

陳緝

丹鼎紅光照洞庭
天壇月色帶躔星
玄都道士蒼精劍
上界仙人白鳳翎
闔闔朝回天蕩蕩
蕊珠經盡晝冥冥
欲從杖屨秋山裏
風雨篝燈采茯苓

送魏司業出守姑蘇

陶誼

東吳父老候麾旌
皂蓋朱幡五馬榮
名郡暫須煩魏相
諸生久恨失陽城
麟符剖玉君恩重
燕寢凝香吏牘清
指日微黃下丹詔
又看環珮入承明

姑蘇感事

王澤

天星夜落水犀軍又見吳宮走鹿犀
睥睨金湯徒自固
倉皇玉石竟俱焚
將軍只合田文死
國士應無豫讓聞
風雨明年寒食節
步孟誰上太妃墳

姑蘇懷古

盧大雅

胥目懸門烏喙過
至今哀怨入吳歌
山河不為興亡改
城郭其如感慨何
廢苑春深芳草滿
荒臺秋盡夕陽多
醉來一覺扁舟夢
也勝豪華逐逝波

吳城懷古

王恭

姑蘇城下刺蘭橈却憶吳王古市朝香輦路邊春寂寂
館娃宮外草蕭蕭千年往事空啼鳥半夜踈鐘自落潮
明發不堪回首處暝烟秋雨過楓橋

謁范祠

費貞

三百餘年十六朝惟公勲德著雲霄一時王佐真伊呂
十倍雄才過管蕭泮水悠悠文澤遠義田奕奕子孫饒
焚香再拜先生像一束生芻不可招

王蘇州綠陰堂

俞貞木

百尺高槐十畝陰
綠雲簾幙畫堂深
魏公相業垂寰宇
蘇子文章耀古今
歷歲風霜空凜凜
近時枝葉更森森
忠臣孝子天為鑑
行見甘棠自作林

暮秋留別吳中諸友

黃守

蘇臺秋色雨中殘
斷雁疎砧送早寒
白髮不辭今日醉
黃花猶作故園看
誰言世路知心少
自是人生會面難
無那明朝江上別
官情離思共漫漫

送沈愚歸玉峯

蘇平

皇州鶯囀柳條新
客裏那堪此送君
歸夢不離吳苑月
還家高臥玉峯雲
江村貰酒逢寒食
驛路看山對夕曛
最是臨岐分手處
落花離思共紛紛

夫椒山

侯讓

曾聞吳越此交鋒
回首蘇臺伯業空
當日斷岩流戰血
至今衰草起腥風
屍國士浮江上
覆面君王死角東
若論滅吳功第一
捧心人在館娃宮

覲菴為沈孟淵賦

丘吉

蠶叢國裏結珠龕過盡東風雪未乾
玉蛹吹開圭竇小金蛾飛入甕
天寬冰絨織箔春無隙香絮蒙頭夜不寒
留取獨綸三百尺明朝相約弄漁竿

送陳緝熙修撰使高麗

丘濬

海上天風吹節旄玉堂仙客錦宮袍
詔頒龍闕恩初下詩到雞林價倍高
萬仞鰲金浮曉日一江鴨綠漲秋濤
遠夷木識中原鳳爭覩天章五色毛

送柔民懌訓導泰和

李東陽

十年三度試春闈親見聲名滿帝畿
甲第久慚唐李邵
奇才終誤宋劉幾
功名晚歲非蓬鬢
湖海官貧尚布衣
試看孤鴻下林薄
壯心還向碧天飛

吳門

張泰

萬井烟花繞故都
闔閭宮苑日荒蕪
江魂吼浪空雙越
山黛顰秋已破吳
臺下草深無過鹿
城頭日落有啼烏
英雄老去年華在
海日曛曛水滿湖

東吳棹歌

汪廣洋

玻璃冷浸洞庭山
霜竹攢攢橘柚斑
白髮吳娃笑相語
官船不似釣舫閒

吳中即景

白雲收盡晚山青
水鳥雙飛入翠屏
一派歌聲何處起
采蓮人在錦帆溼

閶門柳枝詞

小蠻能唱白家詞
笑把纖腰鬪柳枝
愁絕尊前春未老

風流太守鬢成絲

江南春

張楷

滿川啼鳥怨殘紅
水國春園柳絮風
春雨一番江水濶
草痕將綠到吳中

吳宮

楊時彥

畫棟雲消夜氣清
宮前溝水作秋聲
如何醒得吳王醉
多少花枝壓禁城

常熟西郊

王禕

稻禾斂嘉實蘭蕙摧孤芳華滋日已歇遊子多慨慷林
臯集鳥雀吠畝散牛羊物情各有適心與歸雲翔

吳門贈凌才

我家華川上君住蘭江濱百里通一水總是金華人自
我與君別三載幽燕任及此會吳門朱顏各如故同為
異鄉客誼重情依依東風足攜手君何復言歸歸去金
華山日有好山色紫翠積芙蓉綠草眠白石若逢牧羊
子為我寄深情莫令猿鶴怨行矣尋初盟

吳江別連上人

飄零有若此，離別復如何。
情劇酒杯少，愁添詩句多。
荒村黃葉落，極浦白鷗波。
回首相携處，秋風瑪瑙坡。

吳中客懷

獨對一壺酒，自斟還自吟。
句從閒裏得，愁到醉邊尋。
擬廢班超筆，猶懷季子金。
故廬湖上水，誰似甞幽沉。

過泖

入夜初過泖，蒼茫興杳然。
大星懸樹杪，新月出帆前。
夜

酒聊供醉漁歌屢惱眠歸歟繡川上欲辦釣魚船

十一月十日宿陳敬初館中臨別有作

歲十一月當嚴冬江湖水落潛蛟龍蕭條長途客旅散
而我買棹過吳淞茲行豈為飢餓逼念子高誼來相從
托交同門已十載蒙被教益開愚蠢時時彼此互有激
譬持寸筵撞巨鐘姑蘇臺前攬秋色麗正門外尋春容
中間欣戚每相繫要復終始猶駟蛩一自去春與子別
兵戈滿眼紛橫縱又茲相見恍如夢中夜論議披心胸

君言爵祿非所願但願擊壤歌時雍却因文章著不朽
韜晦養粹甘為農顧我所願頗異子謂欲與世相奔衝
黃金鑄印錦懸綬時至未敢辭侯封丈夫出處雖二致
非異愚哲由遭逢得意觖望亦常事所貴自寶如璜琮
計長較短議輒久生聽曙鼓聲蓁蓁人生會合良不易
奈此物役相牽攻君留仍泛越來水我去猶對金華峯
區區離別不足惜且復醉子雙尊釀郊翽自附提籍輩
此事遠矣須追蹤

登姑蘇臺有感

故壘蕭然起暮塵，
憑高何處弔忠臣。
山連吳越東南近，
天入江湖上下均。
歲月多因催髮變，
文章未足濟身貧。
悠然今古無窮恨，
落日商歌倍損神。

東歸留別吳中一二同志

明發閭門一問津，
梅花有意似留人。
誰憐孤館青燈夜，
遙憶高堂白髮親。
對酒論文期隔歲，
到家獻壽及新春。
石田茅屋猶無恙，
飄泊江關惜此身。

常熟舟中

一自歸來東海涯，每依北斗望京華。
才疎謾結交游廣，身遠時驚夢寐賒。
風雨扁舟今若此，功名壯志倍堪嗟。
故人只在虞山下，同看寒梅雪後花。

吳江客中冬至日

十年奔走竟何為，轉覺謀生事事非。
時序每驚愁裏換，家山嘗向夢中歸。
吳江歲晚寒波積，楚塞天空鴻雁稀。
酒後登樓倍惆悵，緇塵猶滿舊征衣。

吳中送僧

唐肅

師向何方去太湖西復西
風傳孤磬遠松偃舊房低
煖榻常留兔浮杯不駮犀
何時城北寺重聽木鷄啼

寄吳思菴敏德

劉溥

翩翩孤飛鴻噉噉苦悲鳴
淒淒覓故侶悠悠傷我情
親交有君子夙昔著徽聲
若為久別離愁思極難勝
微物尚知求人何忘合并
歲月已云遠關山阻修程
惟有托柔詞可以通精誠
相敦在斯道終當垂令名

登蘇臺懷古

一上高城欲斷魂，英雄不見水西軍。
屬鏤劍上飛青血，響屨廊中散綵雲。
日落寒鴉啼古堞，月明金虎出孤墳。
可憐歌舞宮牆地，千古蒿萊走鹿羣。

寄金文鼎

寒暑互來往，衡紀迭遷移。
庭柯辭故榮，園梅發新滋。
撫景成時邁，跼蹐興翹思。
我有素心人，令德仰光儀。
窘然迫冗役，煩促苦縈維。
搏霄羈微紱，吞舟困汚池。
仁窮狡

乃達斯理信可疑願言慎厥恒毋使此道虧

紀懷

犀兕秀以角鳳鳥文其翰嗟予七尺軀徒立天地間六
齡始讀書八歲吟成篇十一學馳馬賭快爭着鞭十三
折右臂積恨存傷痍其年侍家君受詔辭滇南羊腸古
木末烏道青厓端懼有向時失不敢易躋攀行行近一
月始上瀘江船乘流下瞿塘濤聲若雷喧白馬既礮硯
黃牛何潺湲東下疾如箭瞬息三四灘出峽何所見蕭

蕭江竹斑迴頭望小姑高髻雲中鬟旦暮屢有聞鷓鴣
與清猿遠無羈旅情因在父母前入京見天子寵投家
君官賜第全節坊家業裕以寬十四奉嚴命游學從所
安因之遠揚州尋師志彌專但媿駑鈍姿義理悟見難
十八已成冠二十早結婚家居職近侍日夕奉至尊歲
時屬巡狩屢作扈從臣皇業開北京庭闈從此分所居
未有定使我心煩寃時年二十三辭母省家君惟此去
任情憤切迫心肝南風始交夏買舟出龍灣渡江復浮

淮心為南北牽千里至呂梁其險不可言亂石列劍戟
崩流激飛湍澎湃千鼓震衝突萬馬奔官艘與民舟誰
敢相爭先次泊數十里檣櫓千萬竿絙絡自先後密若
蛛網懸一舟須五牛百丈相鈎連分寸不可上頃刻豈
敢延萬一有失勢人死舟亦翻危哉既如此惕惕傷人
顏繼至百步洪咆吼動八垠衛河濫洪波十里九迴盤
逆流上潞水五日至通津陸行四十里塵滿雙車輪巍
巍見雙闕蕩蕩闢九門家君聞吾至客思即欣欣依依

趨膝下昵昵聚至歡如此僅半載命我回南軒南行一
月餘復至龍河濱老母正憶我聞至釋憂煎升堂拜嘉
慶慰問何諄諄爾父久在客體氣能如前跪答喜無恙
家事重勞煩靡靡感歲月不覺十五年迨迨南北京僅
得十往還侍養不得并於此常鼻酸江雲與塞雪日夜
愁相關南京至北京水路餘三千潦水或驟至舟行如
上天枯涸至沒脛閘閉幾欲乾船底沾泥沙颯颯風雨
繁啟閘水則過行計數里慳官置運淺夫云是近縣民

老少立水中裸體恒苦寒曾向皮家溝風雨近黃昏值
淺舟不行舟中水濺濺石格舟底碎一夕不敢眠又嘗
渡淮河挂帆當深淵未濟風大作檣斷水入船又于揚
子江炎空黑雲盤指語同舟者風雨在逡巡衆言但無
害行行勿過論須臾風雨至雷電交轟闐沉沉向昏黑
幅幅慘我魂電光燭巨浪排突千銀山我舟若揚簸股
慄身欲癱良久幸逢坵繫纜江之干隨浪上復下摩戛
將不照倉皇裂衣被裸纜始得全浩浩高郵湖楚坵石

與甌岸下貫連木槎牙猶樹根或值西北風浪觸湖水
渾舟行或遭此粉裂不可完我亦驚此恐百計出危顛
聖人戒歷險我乃備苦辛若欲求安居定省違二親昔
我宣教公自汴來吳壖彼美白馬澗風氣鬱以蟠六世
葬于斯巨木青輪困先祖登仕途墓祭禮遂湮寒雨走
孤兔秋風折荆榛前年三十二嚴命致忱恂言歸報先
德穹碑勒名文告祭享族屬先隴幸一新及乎三十四
北上履前因別家纔一月閨中失其賢傷哉夫婦情淚

下如迸泉今年三十七已繼名家姻携之俱北上敢避
所歷艱家君老多疾養禮庶得申老母仍在南臨別涕
滿巾阿姊送弟婦遠至石城圍舍弟挽我衣哭至長江
濱悠悠可奈何惻惻將誰陳天地生萬物父母生我身
父母幸俱在乃使心恻恻我願天子聖此意早見原不
畏行役苦但恨侍養偏又媿學無成久矣負青春壯志
日銷鏖碌碌難自伸人願得賢子顧我何如人三子總
愚騃不異犬與狔詩以道性情風化庶以宣吟苦每效

之不能致精研舟行適有感述此非自陳隱顯後莫知
出處前已真魏魏聖主德昭父母恩徒有一寸心不
得通青旻此行固猶昨未可即言旋西風送征帆目接
江中蘋

寄陳孟賢

啾啾田家雀栖栖枳棘叢卑哉獲苟遇反鄙高梧桐鳳
鳥奮文翮來儀翔遠風俾與羣雀隣靈德終自窮水炭
各有性寒熱由所從君子防未然此意行當崇

賦得卧佛寺送僧因覺初

祇園隱瓊猊清漢流寶月靈智常湛圓居然示生滅巖
巖鷲峯下峩峩表金刹芳旨存法言端儀儼禪悅于今
二十禩廣路多恒轍子得主其宗弘慈振餘烈

萬壽寺送僧

上刹臨東城門峙雙石幢殿宇既壯麗園林亦芬芳法
侶偕祝釐報本理所常香檀汎華炬響梵申瑤章子復
違同儕淨景開他方願言朝與夕式此期無忘

賦得綵虹壽翰林陳檢討嗣初

長虹垂青天萬丈騰綵紋紅黃既絢爛青碧尤氤氳朝
夕迭東西二氣相蒸薰豈但自輝飭山林亦芳芬孔子
作春秋化玉古所聞薛生灌香醴金屑未紛紛斯人妙
斯道四海昭雄文英華軼班馬五色同忻忻懸弧紀華
誕乘泉應茲辰賦此表嘉瑞庶可道忱恂

送况郡守

使車何遥遥駕言朝帝鄉載馳復載駘原陸迴且長父

老羅道周中心極徬徨
扳轅卧車轍願弗去我
旁借問此為誰太守忠
且良偕彼古名臣四方
允為綱挽挽既勿留惕
惕徒自傷公當即歸郡
慰我遥相望

介軒為長洲沈孟淵賦

天下有定理中正固無虧
君子見其幾毅然堅自持
乾坤莫高厚陰陽迭其時
品彙各成形動息有攸宜
人心具其性仁義誰無之
君臣與父子上下分尊卑
明審不違常餘性咸斯推
特立苟在躬賁育安能移
人能明斯

義固執無他疑外物不我加中心洞無私惟此致休徵
大易昭其辭願言無諂瀆允哉當鑑茲

送蘇性初致仕

蘇公吳中人風度極雅致昂藏野鶴性貴重瑚璉器早
歲遊邑庠穎出異同類心潛春秋學理發天人際聲華
達天聽修纂預中祕名公相引重所蘊有根柢文章追
古作詩篇亦工織鳳皇翔紫霄麒麟卧丹陛綿州古名
郡遠在萬里外牧者難其人沉憂見先帝爰命公守之

于治果有濟綿民滿深望人心感嘉惠豈意丁內艱解
綬歸守制故吏擬文翁良有去思計去年服始闋天官
有常議衆望若綿民公即思謝事憶昔永樂中南都共
文會計齒獨予少公長十餘歲豈惟同邑親抑有同心
義鍾山望春雲龍河醉秋霽高吟叶風雅琅然九臯唳
時當八九人偉望皆前輩探賾妙古今擺落無荒穢公
官即赴蜀去住從判袂胸中富邱壑模寫擅清製窮搜
遂遊歷星駕未安稅長江瀉三峽峨眉倚雲鬢畫意公

入神懷思余不寐奈何二年別彼此親各逝余歸極恹
慘公還更迢遞聚首越三年愈密向時契祥琴始一奏
北上各有為舟行味先後望望失次第及余至北都公
已安族次孟鄰且依栖楊岐釋凝滯粵自別先隴未得
躬往祭雲山屢形夢松楸自深閔向公攄此懷山水親
點綴惟昔曾枉步布置宛相似心神寓其間暫拭天涯
淚再拜致深感什襲寶珍衛迨至今年春率意謀韞銳
筋力未衰老天聽遂其意二疏去已久廉恥日凋弊屹

然立中流允可勸當世瀕行四月初靈雨洗氛翳幡然
戒行李高躅誰可繫悵望遠道車飛塵不能蔽何彼廊
廟材含此玉山桂茫茫薊山雲泛泛吳江柹清風一相
激意氣甚凌厲余獨難為別詩餞無婉媿歸我故山中
可寄蘭蕙思

萬玉清秋圖為金學士公素賦

名園占竒勝萬玉含清秋主人契幽賞賓從迭追遊高
軒擬蓬壺木石擁滄洲金谷差可仿綠水安能倚况此

謝豪權黃金積如邱海舶致珍玩蘭車載名謳張筵日
為樂豐膳羅庶羞瑤琴奏白雪玉瓚傾黃流鼓鐘朝已
陳綬帶夕未休亮有佳倩賢周旋義無尤盛時難久恃
人事忽相仇繁華會銷歇露草生煩憂器覆固戒滿水
逝誰能收惘然覽遺墨故迹庶茲求

送吳邑葉大尹考滿之京

美玉抱貞德表裏無纖塵國士久增重誰能不稱珍始
自登黃甲聿充東閣賓奇文擘瑤藻華譽邁時倫一朝

宰吳邑眷眷為斯民天意蒙幹旋徂秋見陽春茲行報
初考維時歲華新人心感離別恹然若霜晨伊昔在京
國迹異心實親請告適卧疴不獲展殷勤瘳未轉行念
悵望生苦辛翔鴻奮廣陸豈復傾荆榛江海渺萬里乾
坤浩無垠不知理牧間循良今幾人大松翳高蔭終非
蓬蒿隣還當廣其惠庶使一歡欣

寄侍講元玉

徂冬雨寒雪霏霏邁新春昨者方雍積今者復紛紜四

望千里外川途邈難分胡為咫尺天往路不能遵鴻鵠
絕來影芳池無躍鱗飛潛尚有礙奚不阻行人借問張
平子中懷何由申且待升陽景走馬釋悲辛

送楊貳守歌

賢侯楊震之子孫先世清白今尚存早年窮經入太學
氣質洒洒仍温温比來蘇郡作貳守竟赴王事留都門
豈無美政惠黎庶在郡數日誰憑論彼時吾亦居輦轂
息息一識侯面目鄉民以役隸侯者衣食渾如在鄉曲

借問何為致如此盡道賢侯善撫育衆人
有事獨當前
一已無尤自懷足去年歸郡屬暮秋日
日宴坐銷民憂
一段清冰夜光白滿城和氣春風柔
今行僅得三四月
便著實效醇而優乃知人心樂向善
自然感化非要求
後來我亦還鄉國又見居民頌侯德
教行忠厚得古道
政用疏通合常則我既聞之不勝喜
可見始終無矯飭
若使守令皆如侯四海人人被君澤
南風初薰天正晴
江竹解箨江鳥鳴三年通計涖官日
駟馬復作朝天行

我與儒門二三子一壺出祖臨西城來時更勉當時學
莫負如今如此名

嘉定族姪遇來詢其支譜書以此復之

我家世出陶唐後生子有文在其手是為劉累姓始行
歷夏商周德彌久後來有為魏大夫子孫四出遊遠途
至居豐沛有盛業支流蕃衍東西都一支遠出中山下
十九世孫唐吏部又至七世徙河南馬監之孫位司戶
金吾將軍司戶孫柱國事業昭南昆迨傳五世至趙宋

始以醫學為專門其孫官轍來游汴名數後占祥符縣
峩峩大宅雲翼橋刮骨將軍業猶擅曾孫南扈天子車
一子遠從來姑蘇五孫十曾總翹特互有膺仕稱璫璵
本朝太宗在潛邸我祖良醫親近侍我父院判主醫垣
日覲清光侍天子爾祖徙居東海邊于今幾及八十年
至爾從孫僅五代家學久矣忘其傳吳中之族盛支系
南渡至我凡七世祥符之族衆且多譜牒未通心獨媿
念爾與我心有同尋攷世派來相從欣然為爾舉其概

緒德世世其無窮

送劉侍講宗器養病還吳

宗器與予同姓劉子學不如君學優六經一道務該貫
諸子百史勞羅蒐文章霍霍吐光燄龍翔鳳舞精靈愁
嗟予前道久避路相讓豈但出一頭自從入官二十載
史館兩見兼同修三朝寶錄繁班馬列聖大德光虞周
于今經筵職侍講高步日與夔龍游非惟轉擢厯清要
裨補治道陳嘉猷更嘉丰儀極瀟洒珊瑚玉樹含清秋

山東獨步李承旨海內頗識韓荊州予從論交辱款納
薰葭倚玉寧無羞自知狷介仰高義衆口憤嫉徒啾啾
慚予胸中本無物交君私幸成良謀有如富翁啟寶藏
隨手贈遺皆珍投初焉眇小復何似泛泛不啻滄海漚
因君引援頗有得黃河迸裂崑崙丘前年有司謬推荐
飢鶻力短難脫鞵君有贈言極惻藉大匠縮手誰賡酬
句工韻險造意古鑿破混沌精雕鏤至今篋笥富珠玉
常覺几案森戈矛去年寒風襲君臂三月已過猶未瘳

奏章陳請乞歸去同事盡欲相挽留二三元老亦自謂
賢有在野猶旁搜暫容養疾遂其便肯重瓦礫遺琳球
東風二月花滿樓野田處處鳴春鳩西山茶笋味正美
北郭詩友情方稠吾鄉往昔最多士前輩落落如星流
君歸于道復斯倡大振文氣東南陬惟君素志在匡輔
况是先帝親招求遭逢恩遇豈忘報俗子誰敢增愆尤
行行保愛早勿藥豈獨為我行離憂明年三月潞河上
下馬一俟南來舟

送汪清夫赴任蘇州郡守

停君五馬車飲我白玉壺
玉壺皎皎浸明月一片清光
涵九區君今作守蘇州去
離思茫茫隔烟樹雪山輕重
繫此行故人無奈臨分處
昔來挾策朝聖人五雲垂輝
光景新龍頭一笑得才俊
草木盡回天地春一朝忽遇
烟塵起走馬橫飛三尺水
長驅虎豹赴勤王草淺沙平
躍弧矢此邦土壤依京師
選拔保障經睿思為有長才備
文武義膽忠肝天下知
春來半月春未煖玉河水消柳條

短浩蕩江湖料峭風滿眼浮雲吹不斷明到黃堂春未
闌桑麻遍野四隣惟他時倘得還鄉願醉倚華筵賦木

蘭

送盛醫學啟東

客來乘曉發惜別意憧憧月淡官橋樹霜清野寺鐘東
書還故國對酒問哀容遇有南來使雲箋好寄封

次韻金文鼎見寄

締交成莫逆契合日頻來去就憐高誼迂踈媿不才鳳

城寒欲雪龍劍鏞生苔偶有經旬別詩篇辱重裁

送吳二尹還治

復任崑山去從知帝澤深駟馳千里道撫字一生心
海樹含春雨沙棠散午陰今朝送行處風外響清砧

賀翰林陳檢討嗣初養病還吳次趙宗文韻

十年霄漢被朝紳優掌文衡作史臣深荷聖恩乘寵眷
忽辭衰病乞間身田園舊業青山老冠蓋春風白髮新
見說玉堂同集處尚思先帝夢中人

其二

學貫詞林衆所師
明時咸仰鳳來儀
文章妙絕終名世
日月光華早見知
老去一官誠不忝
歸來雙鬢已成絲
獨嗟鴛鴦無成久
德業相從亦未遲

賀况郡守祈雨有感

九重宵旰眷蒼生
親選廷臣得老成
早歲果為霖雨用
清時咸仰景星明
不張皂蓋回天意
惟展丹心達聖情
已向東吳施福澤
聲名無媿任專城

其二

田疇龜坼夏將過太守深憂奈若何千里早苗思潤澤
九天甘雨會滂沱至誠有感昭孚應盛德無私載咏歌
豈但農夫獲秋望昆蟲亦自受恩多

送劉伯慶赴任長洲主簿

清時佐邑任才賢相送都門悵別筵仇覽盛名人共惜
賈生長策世爭傳春風自繞棠梨樹古調誰賡白雪篇
我欲便懷良惠去長河須待木蘭船

寄陳都憲有戒

蘭臺清肅著威儀
出使關中衆所推
陸贄奏章皆合道
陽城公論不容私
秦川萬里風烟靜
夢隴三年雨露滋
玉節尚風歸未得
衡門何日憫栖遲

感懷

為英廟
而作

塞雁南飛又北旋
上皇音問轉茫然
孤臣自恨無容地
強敵猶存共戴天
王衍昔年知石勒
謝玄何日破苻堅
京城四塞山河固
一望龍沙一淚漣

送仰宗太復大理右丞致事

棘寺平反與願違幾年辛苦脫朝衣故人共惜英才老
聖主深憐往事非纔向雲霄承舊寵又從鄉國賦閒歸
盛時何處尋蹤跡萬里滄江一釣磯

送陳頌永之赴任湖州司訓

頌兄亦見任
湖庠訓導

湖庠二妙一清門先後榮除荷主恩畫舫令兄迎阿弟
白頭大母見孤孫天涯碧草春無際溪上香茗晚更繁
最是埧簾和奏處道場山色入芳尊

送韓允熙赴任廣東憲副

聖主中興事遠圖臺臣分職贊洪謨一杯別酒臨東郭
五月官船下直沽定使風塵開百越從來人物盛三吳
廟堂若建平成議繡斧行宣入帝都

送僧道金還姑蘇定惠寺

野鶴孤雲去復還超然不在別離間天河入海傾南斗
海月當秋挂北山萬里江湖蘆葉穩一簾風雨桂花閒
送師憶得尋師處雙塔南頭第幾關

壽刑部俞尚書士朝十二韻

天輔皇明岳降神歲臨丁卯實申生丕承德緒超榮祿
寅亮天工運大鈞每用輕刑延國脈堅將直道濟時屯
黃金暮夜殊無媿白首春秋負絕倫法府光騰三印重
勲階香綻五花新致君堯舜心惟切敷治臯夔德有隣
茲喜新秋逢誕日仰瞻浮翳散高旻上林佳氣通西省
南極諸星拱北辰畫筵引風銷宿暑玉缸和露醞長春
秦中不媿金絲棗吳下虛傳翠縷尊雲漢昭回曾雨穀

海波清淺又生塵他年頓整乾坤了好與松喬作主人
與盧中書過虎丘

昔人來此寄游蹤名字高題紫翠中劫火蒼苔磨滅盡
相看還與不題同

寄趙宗文

解得禪家性外真不將吟思惱閒身殷勤好禮蓮花漏
莫問攢眉出社人

雨中與陳孟文投宿覺海寺菴

臺殿參差映碧池
我來留宿本無期
題詩欲紀經行處
斜日千山雨到時

送劉主事欽謨赴任南京

秋入梧桐雨過初
黃金臺下送行車
西風滿眼傷離早
北事關心老病餘
賈誼道孤終是遠
張衡愁絕竟何如
今朝暫向南都去
他日重來挽帝裾

送周景通還姑蘇

塞雁盡南飛
西風及授衣
不愁孤客老
惟喜上皇歸
雪

心猶壯還鄉夢獨稀忽忽一杯酒何必嘆相違

過沈石田有竹居次徐天全韻 劉珏

烟水微茫外舟行一舍餘既覓沈東老還尋陶隱居冰
弦三疊弄雪覘八分書醉和陽春曲空踈媿不如

送吳範菴會試

秋闈名已動鄉閭得意重驅北上車辭父暫拋菜子服
致君今用伏生書香飄玉陛傳臚處露溼金花錫宴餘
老我閒居憶知己好音頻寄莫教疎

送徐天全再赴張湫

手足胼胝兩鬢秋
功成深慰至尊憂
竒文五色駟妖魘
砥柱千年障橫流
載月仙槎纔北上
冒寒驄馬復南游
垂名竹帛中丞志
不在分封萬戶侯

其二

天語新承寵任專
御爐烟裏玉階前
鹽梅自昔堪調鼎
舟楫于今已濟川
麟閣曉雲隨綵筆
鎬京春酒醉瑯筵
贈行分得烏絲錦
江漢皇華寫數篇

賀俞士悅司寇致仕

白玉階前拜上皇，賜歸爭賀沐恩光。
尚書已結香山社，丞相新開綠野堂。
物外烟霞容我老，陌頭車馬為誰忙。
緣知蔗境春如海，日日邀賓入醉鄉。

送太保陳有戒致仕

分陝功成兩鬢斑，便陳骸骨動龍顏。
仲翁滕有黃金贈，廣德寧無駟馬還。
翠柏十圍霜後老，白雲一片雨餘閒。
懸知別後勞清夢，只在蓬萊咫尺間。

遊吳山寶華寺和錢學士原博韻

錦繡河山似十洲重陽未到已先遊
向平老去偏多興杜牧重來不厭秋
行處却憐雲作伴別時還愛雨相留
呼童摘取芭蕉葉寫得新詩贈惠休

和錢學士原博宴朱玉雪池亭韻

水榭風亭列綺筵白頭相見各歡然
地偏似與三山近人樂無如五福全
檀板來歌按竹下黃橙薦酒擘霜前
蠻牋醉掃三千字渴驥爭奔碣底泉

楓橋送憲副劉欽謨

闌干三百與雲齊，勢壓江橋處處低。
朱雀飛來山雨外，彩虹垂在水城西。
孤舟夜火詩人泊，華表春風貴客題。
此地逢君乘駟馬，只疑平步上天梯。

送姚郡侯更任鎮江

從容旌蓋出黃堂，今日諸侯舊省郎。
纔向吳門作霖雨，又從京口布春陽。
袖歸白璧渾無玷，移作寒梅不改香。
我過甕城須下馬，坐聽田叟咏甘棠。

贈夏太常仲昭

乞得天恩下九關，容臺爭似釣臺閒。
白雲不作人間雨，黃鶴惟思海上山。
欹枕北窗風澹澹，濯纓西澗水潺潺。
大江南去三千里，幾處林泉有客還。

寄林郡侯一鶚

烏府當年拜美官，朝朝整豸立朝端。
青霄露滴朱衣濕，白日霜飛鐵面寒。
折檻尚為明主重，諫章不與別人看。
丈夫憂樂關天下，出守先令一郡安。

其二

春風吹雨過江沙
京口吳門路不賒
燕寢有香分別院
馬蹄無跡到豪家
心常戀闕偏多夢
鬢為憂民却易華
銷盡俸金都奉母
一經教子是生涯

紫薇精舍為陸大參孟昭賦

度水穿林不憚賒
為鄰龍耳在烟霞
數株枯柏郎官淚
千古清風宰相家
石壁掃苔看舊刻
竹爐炊火薦新茶
知君戀闕心猶切
夜夜山中夢翠華

送杜公序西秦修志

聖主垂衣重典章，遠勞修志向咸陽。
文風到處皆鄒魯，事跡收來盡漢唐。
銀燭課書雲作紙，玉函封進錦為囊。
懸知太史編摩日，才贍惟應說杜郎。

送張養正起修日錄

祖席華觴莫漫傳，至尊當宁正思賢。
周家孝友稱張仲，漢室文章重馬遷。
紫塞地寒知雪徧，玉堂天近得春先。
懸知一代書成後，聖德神功播萬年。

送况郡侯

先皇擇守在廷臣惟我賢侯第一人
近向堯天分寵命遠來吳地布陽春
疲民得濟官租減枯骼沾恩義冢新
今日城西回五馬笑看父老挽朱輪

其二

兩鬢秋霜一寸丹循良蜚譽滿朝端
化教薄俗為君子荐及寒儒作美官
廉范來時歌尚在寇恂借去日應難
履聲又入明光殿補袞殷勤佐治安

送馬進士之穿山

五典三墳滿案堆君才不讓呂東萊池邊夜月蘭舟泊
花裏春風絳帳開已見陳蕃待徐孺還期孔子鑄顏回
多情最是穿山色飛入離筵送別杯

送楊郡侯

豈弟多年著德音分符重沐聖恩深陽春有脚來茲郡
暮夜無金愧此心風雨一麾勞勸課桑麻千里動歌吟
如何便促朱輪去又作他方濟旱霖

送陳編修緝熙

孝行廉名是處聞，公門無跡藁無文。
陳情兩度能終制，泣血三年不茹葷。
天上星辰丹鳳闕，江南烟雨白鷗羣。
官船一路行休緩，秘閣諸儒待子雲。

贈甘大尹弘濟

君手宜調鼎鼐，和暫煩花縣。
教絃歌疲民盡怨，來蘇晚。
當路曾嫌直道，多霜冷玉關。
比曾墮葉月明珠，浦不揚波。
紫泥早晚君應捧，思慕其如去後何。

送仰大理還吳

棘寺重登荷聖明，賜歸深愜暮年情。
身如泛梗誰非客，官得懸車始是榮。
醉裏鶯花三畝宅，夢中霄漢九重城。
懸知報國心常在，夜夜教兒對短檠。

答陳醒菴

姓名誰為達金鑿，老去文章盡學韓。
海上魚多長作客，城西田在不思官。
音書曉托三湘雁，香佩秋紉九畹蘭。
昨日壺觴論契濶，菊花叢裏得盤桓。

其二

玉堂仙去白雲鄉更喜風流得仲將紫玉製簫吹別調
黃金換酒滌愁腸百年天地雙青眼十畝園林一舊莊
記得去年同看竹水雲深處叩僧房

其三

畫舫頻過柳外莊南溪原得近東陽風來絕磴水無迹
月到空山樹有光愁裏得詩如老杜醉中揮墨過顛張
別來兩月無清約孤負寒梅一度香

贈黎郡博

芝草蘭花滿座香，好詩無愧刻青琅。
燈前教子抄長策，馬上逢人問故鄉。
劍氣夜橫低北斗，詞源春漲倒瞿塘。
明年諸弟多高選，細看泥金字幾行。

再壽沈覲菴

八十遐齡又六期，我慚初度獨來遲。
玉桃只許東方得，紫氣還容令尹知。
洞裏樓臺千歲藥，人間甲子一枰棋。
多情欲釀滄溟水，忝入年年獻壽卮。

寄沈同齋

藥蘭花徑斷紅塵坐閱昇平五十春
親紙有書皆晉體
錦囊無句不唐人
新圖寫就多酬客
美酒沽來只奉親
昨夜天涯憶君夢
西風吹過楚江濱

酬杜東原見寄

杜郎高義薄雲天
慚我交來最有緣
花徑藥闌三畝宅
筆牀茶竈五湖船
寫山不讓王摩詰
釋難曾輕魯仲連
昨日開緘見珠玉
老年才思益飄然

送沈石田遊金陵

丈夫安得守茆茨西上金陵看絕竒為報鳳皇臺上月
有人來和謫仙詩

同天全宴夏太常仲昭第次韻六首

席上歡呼總貴郎早春時節醉江鄉要知勝事傳千載
元老題詩贈奉常

梅花白白柳條新描出江南一片春莫向東風惜沉醉
與君俱是故鄉人

潮陽太守青雲器鳳閣仙郎白雪歌銀燭瑤觴鬱金酒
好情其奈主人何

寶馬香車看物華春城無處不開花旁人莫笑耽游樂
四海于今是一家

風流白傅老詩仙製得新詞教李娟翠袖送香來綺席
玉杯邀月上青天

甲第如雲枕碧流到門時復有王侯花闌竹徑清如洗
我亦踈狂五日游

祝大叅侗軒祖席

詩酒前廳未盡情
更移瑤席向園亭
最憐一樹垂楊柳
眼為行人特地青

寄葉與中

一從銜命出金鑾
玉塞迢遙再拜難
惟有長安舊時月
幾將幽夢到桑乾

赤城西去到雲州
禾黍高低萬里秋
聞說盧龍皆竄伏
禁中頗收在邊頭

送尤文度歸吳中

我友整遐裝誓將起旋歸平明發城邑率彼東路肥爰
與二三子祖餞臨郊岐中觴趣分袂恨恨使我悲嚶鳴
求其友竊慕伐木詩平生攜手好何為輕別離行當阻
山岫安得覩光儀情敦思苦深久要諒不遺各言宗令
德庶保黃髮期

同蔡騏尚遠尤安禮文度朱智仲禮楊翥仲舉

蔡胄用嚴遊東山

得剪字

步出城東門，逍遙望雲巘。累月懷佳遊，茲晨遂登踐。梵
宇繞層阿，飛樓凌絕峴。方塘涵湛碧，喬林茂敷衍。繁翳
幽莫通，丰茸紛不剪。攀磴窮高躋，緣徑屢回轉。是時微
雨散，輕霞淡舒卷。睇遙素橫川，俯夷綠盈畎。陟降體自
便，顧盼心已緬。况接曠士言，復偶釋子辯。析空理勿昧，
違喧抱逾展。何當此間棲，永令浮慮遣。

寄尤文度

苦憶尤參議，投簪養病勞。卑棲摠不厭，閒散自能高。階

陰淵明柳門深仲蔚蒿平生冰雪意猶足重吾曹

又寄

三年別帝京歸卧闔闔城貧病疎朋友艱難倚弟兄香
焚瓦鼎細寒擁紙屏清自有床頭易時時暢道情

約蔡尚遠朱存理蔡用巖尤文度楊仲舉遊東

山

東山東望屹如帷久待穿雲躋翠微五色烟霞浮寶塔
千行松竹護禪扉春來況復芳菲盛客裏堪嗟會晤稀

為報明朝著雙屐及時清賞莫相違

送尤文度赴貴州叅議兼寄武昌故人

三十年前江漢上清風滿洒共襟期折蘭閒咏離騷賦
看竹頻過孝感祠已幸兩京重論舊何堪萬里又分歧
故人相遇應相問為道非才負聖時

送尤安禮

集詩

歌君子之馬送友也友人歸吳而麗澤之益將日疏
遠焉故集詩句以道其情

君子之馬六轡如絲言念君子如璋如圭其德不爽敬慎威儀

君子之馬六轡沃若言念君子如金如玉其德不回威儀抑抑

豈無他人不如友生邂逅相遇德音不忘惠而好我示我周行

言笑宴宴惟予與汝汝轉棄予誰與獨處中心養養往送于野

與子成說方何為期既曰歸止曷云能來子寧不來悠
悠我思

送尤先輩歸吳

門巷蕭條過者稀諸孫憔悴日牽衣豈無幕下三千客
又送吳中一棹歸漢樹臨風寒自落江雲帶雪晚猶飛
由來去邑懷桑梓不是還山戀采薇



吳都文粹續集卷五十